

況等乏食單于廼給其糧失期不還五十餘日初上遣

稽留昆隨單于去到國復遣稽留昆同母兄右大且方

與婦入侍師古曰且音子間反還歸復遣且方同母兄左日逐王

都與婦入侍是時漢平帝幼太皇太后稱制新都侯王

莽秉政欲說太后以威德至盛異於前師古曰說讀曰悅以此事取悅

於太後廼風單于師古曰風讀曰諷令遣王昭君女須卜居次云

入侍師古曰云者其女名太后所以賞賜之甚厚會西域車師後

王句姑師古曰句音鉤去胡來王唐兜師古曰為其去胡而皆來降漢故以為王號

怨恨都護校尉將妻子人民亡降匈奴語在西域傳單

于受置左谷蠡地遣使上書言狀曰臣謹已受詔遣中